



TERKINI UTAMA & SENSASI

By [Mohd Arshad](#) 27/06/2022 0 746

Ramai rakyat Malaysia yang berkemampuan tentunya berasa teruja dapat kembali melancong ke luar negara selepas sempadan negara kembali dibuka bermula 1 April 2022.

Ikuti Mynewshub: Facebook, Twitter, TikTok, Telegram, Instagram

Jabatan Imigresen Malaysia pada Mac lalu malah memaklumkan telah menyediakan 970,000 passport bagi mereka yang ingin membuat permohonan atau memperbaharui pasport lama.

Bagaimanapun dalam keseronokan mahu ke luar negara ada perkara yang amat penting perlu dilakukan, tetapi kerap diambil mudah oleh sebilangan rakyat Malaysia.

Perkara penting tersebut adalah menyemak sama ada mereka dikenakan sekatan untuk ke luar negara oleh Lembaga Hasil Dalam Negara Malaysia (LHDNM).



Sebab itu juga banyak kali peringatan berkenaan perkara itu pernah dibuat oleh LHDNM sama ada melalui media massa maupun media sosial sebelum ini.

"Sudahkah anda menyemak dan menjelaskan cukai pendapatan sebelum ke luar negara?," kata LHDNM.

Jom kita ambil tahu serba sedikit mengenai sekatan ke luar negara yang dikenakan oleh LHDNM agar kita menjadi rakyat yang lebih bermaklumat dan berinformatif.

Menurut LHDNM, individu atau pengarah syarikat yang gagal menjelaskan cukai pendapatan, cukai keuntungan harta tanah atau cukai korporat akan dikenakan sekatan ke luar negara.

Pemakluman tindakan tersebut akan dibuat ke alamat terakhir yang dikemaskini oleh pembayar cukai kepada LHDNM melalui data percukaian terkini yang direkodkan.

Ini bermaksud setiap individu atau pengarah syarikat harus mengambil inisiatif untuk mengetahui sama ada mereka dikenakan sekatan walaupun mungkin telah berpindah alamat.

Tiada alasan untuk mereka tidak mengetahui tindakan tersebut kerana terdapat pelbagai cara yang amat mudah dan cepat untuk mereka menyemak perkara berkaitan.

Semakan boleh dilakukan melalui portal MyTax di pautan <https://mytax.hasil.gov.my/> atau di laman web Jabatan Imigresen Malaysia di <https://sspi.imi.gov.my/sspi/>.

Mereka malah boleh mendapatkan maklumat tersebut melalui panggilan telefon di talian Hasil Care Line 03-89111000 / 603-89111100 (Luar Negara) atau melalui HASiL Live Chat.

Individu atau pengarah syarikat juga wajar menyemak sama ada mereka dikenakan sekatan ke luar negara seminggu lebih awal sebelum tarikh berangkat.

Ia kerana mereka yang mahu membatalkan sekatan ke luar negara tersebut perlu melunaskan bayaran cukai sepenuhnya.

Kemudian perlu mengemukakan resit bayaran ke cawangan LHDNM yang mengendalikan fail cukai mereka tujuh (7) hari sebelum tarikh perjalanan.

LHDNM bagaimanapun tidaklah zalim dan kurang berperikemanusiaan. Jika tidak dapat menjelaskan tanggungan cukai sepenuhnya masih boleh memohon pelepasan sementara.

Syaratnya adalah hadir ke cawangan LHDNM yang mengendalikan fail mereka sekurang-kurangnya lima (5) hari sebelum tarikh perjalanan.

Kemudian mengemukakan surat permohonan mengandungi maklumat destinasi, tujuan dan tempoh di luar negara dan membuat bayaran 50 peratus daripada jumlah cukai tertunggak.

Surat pelepasan sementara akan dikeluarkan oleh LHDNM kepada pembayar cukai dengan menyatakan tempoh pelepasan sementara yang diberikan.

Kesimpulannya adalah 'afdal' kita mengambil inisiatif melakukan semakan secara berkala agar tidak kelam kabut apabila ada keperluan ke luar negara secara tiba-tiba.

-Mynewshub

